

3

OBSERVATIONES QUAEDAM
DE
PULSU ARTERIARUM,
VALETUDINIS SIGNO.

AUCTORE
IUSTO RADIUS

PHIL. MED. ET CHIRURG. DOCT., SOC. HIST. NAT. CURIOS. LIPS. BIBLIOTH.,
ACAD. LEOPOLD - CAROL. SODALI ETC.



LIPSIÆ
SUMTIBUS RECLAM
clbccccxii.

Digitized by the Internet Archive
in 2016

<https://archive.org/details/b22288727>

V I R I S

EXCELLENTISSIMIS, EXPERIENTISSIMIS

CHRISTIANO FRIDERICO
SCHWAEGRICHEN

PHIL. ET MED. DOCT., FACULT. MEDIC. LIPS. ASSESS., HIST. NAT. P. P. O.
BOTANIC. P. P. E., SOC. HIST. NAT. LIPS. DIRECTORI, SOCIETT. IMPER.
LEOPOLDINO - CAROL., MOSCOVIENS., REGIAE GOTTINGENS, MONACENS.,
PHYSICO - MED. ERLANGENS., NAT. SCRUT. HALENS., HARLEMENS.,
HEIDELBERG., MARBURG., WETTERAV., OSTERLAND., RATISBON.,
PHYTOGRAPH. MOSCOVIENS., MINERALOG. DRESDENS.,
IENENSIS, OECONOMIC. LIPS. ETC. SODALI

ET

CAROLO AUGUSTO KUHL

PHIL. ET MEDIC. DOCT., CHIRURGIAE P. P. E., INSTITUTI CLINICI REGII
NEC NON URBIS NOSTRAE CHIRURGO PUBLICO PRIMARIO, SOC. NAT.
CURIOS. LIPS. SOCIO ETC.

PRAECEPTORIBUS ET PATRONIS

OMNI PIETATE COLENDIS,

HAC DEDICATIONE GRATUM ANIMUM SIGNIFICARE

VOLUIT

A U C T O R.

LECTORI S.

Cum in dissertatione de *Pyrola* atque *Chimophila*, plantis medicinis, ante hunc annum edita, proxima me scribendi occasione argumentum illud ulterius persecuturum esse promiserim, virique honesti sit, promissis suis stare atque officio semel suscepto satisfacere: vereor ne multi, quod hoc tempore, quo aeris illius alieni persolvendi occasio oblata est, aliud elegerim scriptiois argumentum, sint reprehensuri. Qui si audierint cur ita fecerim, non dubito quin eius rei veniam lubenter daturi sint. Quippe non mea est culpa, sed rerum inopinatarum. Namque primum coepta analysis chemica casu quodam interveniente minus prospere quam sperabam, succedebat, et herbae *Chim. umbellatae* raritas efficiebat experientiae difficultatem; deinde vero etiam, idque gravissimum est, Viri Exc. Exp. Heineckenii, medici apud Bremenses primarii et celeberrimi, obser-

vationes quos benevole mecum communicavit, a meis aliquantum recedunt; quam ob rem denuo de Pyrola experimenta instituenda sunt; atque idcirco res in aliud tempus differenda. Quae cum ita se habeant, et me in specime inaugurali edendo, instante peregrinatione quam suscipere meae rationes postulant, maturandi necessitas urgeat; consilio mutato quae de pulsu quamquam ad alium finem collegeram, in lucem proferre malui. Haec quidem qualiacumque sint oro rogoque Lectores benevolos, ut velint benigne accipere, meque sibi habere commendatum.

Sectio prior.

Semiotice pulsus physiologica.

§. 1.

Pulsus ipse quid sit, etsi satis inter omnes constat, tamen quae-
nam eius causae remotiores et propiores habendae sint, de eo
quidem variae variis temporibus sententiae exstiterunt. De qua re,
quoniam nostra potissimum aetate a viris clarissimis gravissima et
maxime memorabilia facta sunt experimenta, eaque quae ad phae-
nomena pulsus recte iudicanda eorumque dignitatem semioticam
explicandam multum conferre videantur, gravissimorum hic bre-
viter facere mentionem, a meo instituto non alienum fore putavi.
Namque inde ab Herophilo ad recentiora usque tempora plerique
in ea fuerunt sententia, ut naturam pulsus vel potius pulsatio-
num¹⁾ in arteriarum expansione et contractione quaerendam esse

1) Distinguendum est quam maxime inter pulsum atque pulsationem: ille
plurium pulsationum serie consistit (cf. *Wetsch*, medicina ex pulsu

existimarent ²⁾. Verum enim quoniam hae, ut medii iam aevi physiologi quidam, veluti *Weitbrechtus*, et postea de animalibus frigido sanguine praeditis *Remus* ³⁾ et *Hallerus* ⁴⁾ observaverant, adeo lenes et exiguae sunt, ut vix percipiendae et subtilissimis tantum instrumentis metiendae sint; pro pulsationum causis vix ac ne vix quidem haberi possunt. Nihilominus omnes fere medici, in iisque etiam illi qui de pulsu morbose affecto scripserunt, hanc opinionem pertinaciter retinuerunt ⁵⁾, donec *Bichatius* novam de hac re sententiam in medium protulit. Is enim primus arterias suo loco motas pulsationum causas esse docuit, quam sententiam etiam *Autenriethius* ⁶⁾, locomotionem illam facilius quam contractionem et expansionem animadverti posse observans, confirmavit. Neque tamen haec rei explicatio ita comparata visa est, ut omnium desideriis satisfaceret. Itaque nuper experimentis sagacissime et diligentissime a *Parry* ⁷⁾, et postea ab *Heckero* ⁸⁾ institutis

p. 31); pulsatio autem ipsa illud arteriarum movimentum dicitur, quod unius ictus sensu digitos afficit.

2) *Gruner* Semiot. phys. et pathol. p. 73. §. 112.

3) Experimenta quaedam circa circulationem sanguinis instituta. *Gotting.* 1752. p. 47.

4) Opera minora p. 288.

5) Cf. inter alios *Prosp. Alpin* de praes. vita et morte plur. locis. *Rega* accurata med. meth. p. 144. aph. 433. *C. Sprengel* Semiot. p. 203. §. 470.

6) *Physiolog.* I. p. 222. §. 369. et pag. 215. §. 361.

7) *Parry, C. H.* Experimental-Untersuchungen über den arteriösen Puls, aus dem Engl. von *E. v. Embden*. Hanov. 1817.

8) *Hecker* in *Horn's Archiv.* 1821. p. 493.

demonstratum est: *neque dilatationem et contractionem, neque locomotionem*, quippe tantummodo in vasis admodum relaxatis conspicuam; *solam sufficere ad pulsationes arteriarum efficiendas; imo potius impetum sanguinis*, qui quasi continuam in arteriis columnam constituat, *versus illud arteriarum spatium quod digitorum pressione augustius redditur* ⁹⁾, *causam illarum esse habendam*; atque inde fieri, ut neque in minoribus vasis, quorum lumina comprimi nequeant ¹⁰⁾, neque in iis, quae molli substantia cingantur ¹¹⁾, ulla pulsatio animadvertatur. Quae quamvis subtiliter disputata sunt, tamen locomotionem aliquam ad pulsationes, eas praesertim quas oculis cernimus, tum cum arteriae relaxatae sunt ¹²⁾ nec dura substantia circumdatae ¹³⁾ aliquid conferre, nullo modo negari postest.

Similia dissidia etiam de causa pulsus remotiore, sive de vi expansiones atque contractiones illas, quas statuerunt, excitante, obtinuerunt. Nam eam alii in corde, alii in arteriis ipsis, alii in corde et arteriis coniunctim agentibus ¹⁴⁾, alii in aliis sitam esse putarunt. Fuerunt etiam, qui eam in tarditate antecedentium san-

9) Quod vulgo *spatium pulsans* vocant.

10) *Spallanzani* de, fenomeni della circolazione osservate nel giro universale dei vasi. Modena, 1773. p. 184. *Autenrieth*. l. c.

11) Nam tum compressionem nullam admittunt sed totae recedunt.

12) Parry l. l. p. 118. seq.

13) Hecker l. c. p. 503. comparat arterias cum utriculo, in quo, si cum impetu fluidum aliquod iniicitur, similis serpentina locomotio observari potest.

14) Sprengel, Geschichte des Pulse. p. 7.

guinis undarum, et in resistantia in vasis minoribus obtinente, quærendam iudicarent, quippe qua utraque fiat, ut sanguinis unda serius emissa, et quo minus aequali celeritate progrediatur impedita, pressionem aliquam versus arteriæ latera efficiat. Verum enim vero cum experimentis comprobatum sit eandem, ne dicam majorem, sanguinis celeritatem esse in vasis minoribus ac maioribus ¹⁵⁾, hæc quidem sententia minime omnium mihi probatur, videnturque ii proxime ad verum accessisse, qui cordis arteriarumque vim, pulsus causam agnoverunt ¹⁶⁾; quamquam ferè eos omnes, arteriis iusto plus hac in re tribuisse censeo, cum sine cordis vi motrice, pulsum verum inveniamus nullum, neque eum pulsationis sensum qui vi arteriarum vitali (tonicity *Parry*, *Ton*, *Ebden*, *Hecker*) aut elastica (quas rite distingui oportet) excitatum, pulsum nominari posse existimem. Quocirca equidem pulsus omnem propemodum causam in cordis contentione quaerendam arbitror. Hac enim fit, ut sanguis iterata systole cum impetu in arterias propellatur, latera a digitis compressa in pristinum locum restituat atque interdum ¹⁷⁾ locomotionem aliquam serpentinam efficiat. Pendet autem recte de pulsus natura notio, maxime a recto de circulatione sanguinis iudicio, quod quis nescit quam perversum saepe fuerit?

15) *Haller*, Opera min. p. 191. *Doellinger*, Ign. vom Kreislaufe des Blutes, im VII. Bd. der Denkschriften der k. Acad. d. Wissensch. zu München. p. 42.

16) *C. Sprengel* Gesch. des Pulses p. 7.

17) vide supra pag. 3.

§. 2.

Sed lites illas physiologicas cum componere nobis non proposuerimus, attigisse modo sufficiat recentissime institutas ab Ill. *Doellinger* de hac re disquisitiones. Is enim a. 1820 de sanguinis motu diligentissime egit experimenta, et item, quatenus fieri potuit figuris illustrari curavit ¹⁸⁾, quae ad pulsus phaenomena rite iudicanda, et praecipue ad sententiam eorum qui solam fere cordis vim ad excitandum pulsum sufficere arbitrantur, stabilendam atque confirmandam plurimum valent. Contigit enim ei esse tam felici, ut in spiraculis *Myae* ovula piscis cuiusdam, inveniret, quorum nonnulla iam eo usque evoluta erant, ut embryonum capitula et caudae distingui possent. Nonnulli pullorum, 2—3 lineas longi, et ob pelluciditatem optime ad microscopicas observationes sanguinis in eorum corporibus circulationis comparati erant, praesertim cum plures horas vivi et sani manerent. Quod tanto magis animadvertendum est, quod ne in avium quidem embryonibus, ut quae ovo fracto mox calorem animale ammittant et moriantur, similia experimenta instituere licet. Vidit autem *Doellinger* ope lentis vitreae compositae, massam quandam granulosam, nihil a Zoogenio (*Schleimstoff*, *Thierstoff* ¹⁹⁾) aliorum animalium diversam, in qua veluti in arena rivuli e sanguinis globulis formati movebantur, etiamsi plurimi eorum parietibus

18) In tractatu modo laudato, cui accidit ut in actis societatis cuiusdam lateat, quibus, pro dolor, communis sors est a paucis tantum legi.

19) Quod telam male sic dictam cellulosam constituit.

nondum inclusi erant ²⁰⁾. Quae res ne cui inaudita videatur, jam ante *Doellingerum* sanguinem sine parietibus suis motum observaverant *Malpighi* ²¹⁾ *Leeuwenhoek* ²²⁾, *Cheselden*, *Reichel* ²³⁾, *Spallanzani* ²⁴⁾ alii, quos vir doctus ipse laudavit. Patet vero inde, vasa non esse primariam motus sanguinis causam. Cujus rei aliud etiam argumentum in eo cernitur, quod sanguis aut lymphæ, quae ejus locum explet, prius adesse debet, quam vasa, quae ab eo, quaemadmodum omnes corporis partes, gignuntur et nutriuntur. Idem jam dudum de avium embryonibus conpertum habemus, in quibus sanguis extra vasa formatus rivulos constituit, et sensim tantummodo suis parietibus includitur. Simili modo intra fines arteriarum et principia venarum apud omnia animalia haud parvam sanguinis partem vasis carere et libere in Zoogenio vagari animadvertere licet; quam quidem rem *Leeuwenhoekii* ²⁵⁾, *Gruithuisenii* ²⁶⁾, *Doellingeri*, aliorum experimenta comprobant.

20) Maximi tantum parietibus suis inclusi erant, quod regularis eorum decursus docebat, minores revera iis destituti; quam rem uberius expositam et argumentis probatam, vide in ipso *Doellingeri* tractatu p. 21. media.

21) Opera omnia Londini, 1646. p. 141.

22) Arc. nat. p. 52.

23) De sanguine eiusque motu experimenta. Lips. 1767.

24) l. c. p. 144.

25) Experim. et contempl. p. 183.

26) Beiträge zur Physiognosie und Eaytognosie. München, 1812. p. 159.

Non minoris momenti est illa Ill. *Doellingeri* observatio, qua sententiam *Malpighi* ²⁷⁾, *Leeuwenhoekii* ²⁸⁾, *Bakeri* ²⁹⁾, *Halleri* ³⁰⁾, *Spallanzani* ³¹⁾, confirmavit, sanguinem aequali impetu cum cordis systole per totum corpus moveri existimantium, ita quidem, ut systoles tempore citius, diastoles tardius fluat, atque adeo in embryonibus plane quiescat. Idem illud et *Ipse* iam antea in embryone gallinaceo observaverat ³²⁾, et *Leeuwenhoek* ³³⁾, et *Spallanzani* ³⁴⁾ in cauda anguillae et alis *vespertilionum* viderant. Memorabile vero, quod nunquam neque expansionem neque dilatationem vasorum aut rivulorum sanguineorum parietibus carentium, ne corde quidem validissimo, animadvertit. Namque hac re admodum verisimile redditur, in maioribus quoque vasis nullam ab sanguinis unda effectam dilatationem, aut perexiguam tantum, ad sensum pulsationis excitandum haud sufficientem, edesse ³⁵⁾.

His igitur experimentis a viro, praeiudicatis opinionibus minime occupato, diligenter institutis, cor pulsationum arteriarum fontem quasi et primariam causam habendam esse docemur.

27) l. c. p. 92.

28) l. c. pluribus locis. Contin. Arc. nat. p. 141.

29) Das zum Gebrauch leicht gemachte Microscop. Zürich, 1756. p. 133.

30) l. c. p. 187 et 196.

31) l. c. multis locis.

32) l. c. p. 46.

33) l. c. p. 188. Cont. arc. nat. p. 114.

34) l. c. p. 173.

35) Doell. l. c. p. 52. Remus l. c. p. 47.

Quae cum ita sint, in semiotico quoque pulsus iudicio, magis quam adhuc factum est, ad cor ipsum vel idiopathice vel sympathice affectum respiciendum esse facile intelligitur.

§. 3.

His de natura atque causis pulsus praemissis, ad varias illius formas considerandas progrediamur, et videamus quaenam corporis mutationes inde cognosci queant. Nam gravissimis ille profecto signis ³⁶⁾ status functionum vitalium vel turbati vel non turbati accenseri debet ³⁷⁾, cum ad rectum de corporis irritabilitate, sensibilitate et reproductione iudicium ferendum plurimum conferat. Unde etiam factum est, ut iam antiquissimis temporibus ars sphygmica plurimi aestimaretur et eo usque coleretur, ut ob nimias in pulsum rationibus significandis nugae et argutiae in contemptum abiret, atque ita omnia propemodam commoda ex ea utique percipienda pessumdarentur. Quod quidem non solum de *Sinesarum*, qui fetus sexum ³⁸⁾ ex pulsu et mortem quadriennio post eventuram ³⁹⁾ declarabant, arte sphygmica ⁴⁰⁾ valet, sed ut videtur, etiam de organica illa *Franc. So-*

36) *Wetsch* Medicina ex pulsu. pag. 52.

37) *Kopp, I. H.* Beobachtungen im Gebiete der pract. Heilkde. Frankfurt a. M. 1821. p. 53.

38) *Gruner* l. l. p. 59 §. 90.

39) *ibid.* p. 57. §. 85.

40) Cf. *Andr. Cleyer*, Specim. medic. Sinicae, Frankof. 1682. *Mich.*

Boymii Clavis medica ad *Sinesarum* doct. de pulsibus, ex recens.

lani, Bordieui, Fouqueti, Wetschii aliorum ⁴¹⁾, qui crises post tres aut quatuor dies eventuras praesagire posse opinabantur. Scilicet etiamsi variorum organorum affectiones variam etiam ac certam quandam vim in cor exercere negari non possit, tamen haec res utpote cognitu difficillima aut plane fictitia, multam requirit cautionem, ne, dum coniecturis indulgeas, in gravissimos errores te abstrahi patiaris.

§. 4.

Sed mittamus uberiores harum rerum explicationem, quippe iam saepe expositarum et parum ad semioticam facientium ⁴²⁾, atque statim ad considerandas illas pulsus mutationes, quae ad valetudinem iudicandam adhiberi recte possunt, progrediamur. Ordiendum autem videtur ab illa pulsus conditione, quae sano statui propria est. Nam non nisi rite perspecta physiologia (a qua pathologia divelli nequit) semiotice vera existere potest, quippe quae inversa quodammodo via physiologiae obviam eat. Quemadmodum enim illa internas vitae rationes indagare, atque inde phaenomena vitalia explicare studet; ita semiotice phaenomena arripit et inde ad internas vires et rationes concludit. Quam quidem rem apud *Wolfartum* ⁴³⁾ hoc modo expressam inveni:

Cleyeri. Frankof. 1686. *Sam. Schaarschmidt* Semiot. Sect. II. p. 68. seq. *Chr. Godofr. Gruner* Semiot. p. 43.

41) Cf. *Gruner*. l. I. p. 125.

42) *Sprengel* Sem. p. 239 §. 562.

43) *Grundzüge der Semiotik*. Berlin, 1817. p. 41. §. 14.

„Die Erforschung und Erkennung aller Vorgänge im lebenden menschlichen Organismus zerfällt mit ihren nothwendigen Bedingungen nach ihren beiden Haupttheilen oder Polausdrücken hin in zwei Haupttheile:

a) in die innere Erkenntniss, welche es zunächst mit der unmittelbaren Construction des Lebens selbst, seiner Bedingungen, sodann seiner Zustände und der Merkmale derselben, nach dem äussern Pol hinausbildend zu thun hat;

b) in die äussere Erkenntniss des Lebens als Erscheinung; von den äusseren Phaenomenen ausgehend, sucht sie den ihnen entsprechenden inneren Zustand darzustellen, und gelangt nun in entgegengesetzter Richtung zu Physiologie und Pathologie.

Beides aber ist unzertrennbar, weil erst aus der richtigen Erkenntniss der Harmonie der Maassstab für jede Disharmonie entnommen werden kann.“

§. 5.

Sed ad rem veniamus. Spectandae autem sunt in omni pulsus observatione primo *frequentia* pulsationum h. e. numerus, qui certo quodam temporis spatio observatur; deinde *celeritas* h. e. temporis momentum quo unius pulsationis sensum percipimus; tum *impetus* quo digiti tangentes feriuntur et vires sanguinis iis obiiiciuntur; denique *aequalitas*, quae cernitur in aequali ratione temporis et roboris, quamque si ad singulas pulsationes respicimus *aequalitatem proprie sic dictam*, si vera ad regularem plu-

rium pulsationum vel aequalium vel inaequalium decursum ⁴⁴⁾, *ordinem* vocamus. Quae omnia, quando iusto modo, h. e. eo quam natura nos maxime salutarem esse docuit, procedunt, pulsum sanum siue naturalem dicimus, ut is adeo satis frequens, celer, validus ⁴⁵⁾, et omni modo aequalis ac ordinatus esse debeat. Alii vero naturales pulsus nullis omnino nominibus insigniverunt, sed medios inter duos status morbosos, invicem sibi oppositos, esse voluerunt, veluti *Lommius* ⁴⁶⁾, qui ita eum describit: „*Optimus pulsus censeturis, qui medius est inter magnum et parvum, inter celerem et tardum, inter crebrum et rarum, inter vehementem et languidum, inter mollem et durum, inter plenum et vacuum, quique bonam inter se ictuum proportionem, aequalitatem, ordinemque retinet.*“ Secuti hunc sunt *Grunerus*, alii.

Quando pulsus omnibus his rationibus bonus est, species quaedam et norma illius existit, ad quam omnes eius formae iudicandae sunt. Sed ab hac norma in hominibus, etiam ceteroquin sanis, fere semper hoc aut alio modo deflectit, et pro maiore minoreve huius aberrationis gradu variarum organismi perturbationum testis est; quemadmodum contra e pulsu aegrotorum, sensim ad normam rursus accedente, aequilibrium in diversis organismi partibus

44) Pulsus *aequalis* ab *ordinato* quam maxime distinguendus, cum pulsus quamvis admodum inaequalis tamen ordinatus esse possit; quanto ex. gr. tertia quaeque aut septima pulsatio minor est. cf. *Wetsch* l. l. p. 40.

45) Vide infra §. 7. sq. ubi de pulsu sano, pro aetate, sexu, reliq. diversis uberius agitur.

46) *Lommi*, *Iod. observat. medic. libri III.* Amstelod. 1761. l. III. p. 304.

restitutum, crises rite peractos, atque sanitatem redituram esse conicere licet.

§. 6.

Monuimus iam supra, relativam aliquam sanitatem, cum multis haudque exiguis pulsus abnormiatibus coniunctam adesse posse. Cuius rei contrarium in morbis reperimus, quibus interdum pulsus fere normalis est *). Quare in utroque statu et sano et aegroto ad reliqua quoque symptomata respiciendum est, neque soli pulsui fides habenda. Nam saepe „*pulsus sanus, urina sana, aeger moritur.*“ Accedit quod pro varia rerum naturalium et non naturalium, quas vocant, in corpus vi, diversissimas pulsus formas invenimus. Pertinent huc imprimis *aetas, sexus, temperamentum et constitutio, animi pathemata, aeris coelique temperies, anni dierumque vicissitudines, situs corporis, et vitae ratio sensu latissimo* 47).

§. 7.

Ac primum quidem quod ad aetatem attinet, satis notae sunt illae pulsus differentiae, quae variis vitae aetatibus in hominibus observantur. Infantibus enim et pueris pulsus est multo celerior, quam adultis, in quibus illa celeritas febrem indicaret, cum in his pulsationes 65—75 iustus in minuta numerus sit 48), in pueris

*) Grun. l. l. p. 106. §. 141.

47) Fundamenta Semiot. medicae, partim ex Fr. Hoffmanni medic. rat., partim ex propria observatione depromptae. Halae, 1749. p. 25. §. 24.

48) Sprengel Sem. p. 209. Autenrieth l. c. I. p. 209. numerum ad 65—70 restringit, tempore vero vespertino 75—80 observavit.

vero 85 — 90, et in infantibus 95 — 100 ⁴⁹⁾. Pulsus hominum aetate provectorum validior quoque maior et plenior ⁵⁰⁾ quam iuniorum esse solet, cuius rei causam in eo mihi reperisse videor, quod cor maiorem vim contraxerit ideoque pulsationes validiores, licet rariores ⁵¹⁾, efficiat. Unde etiam patet cur senum pulsum debilem, parvum et rarum saepe inveniamus. Sed multae hic varietates reperiuntur, pro variis iisque haud raro organicis vitiis quae hac in aetate saepius adsunt.

§. 8.

In sexu sequiori pulsationes crebriores et celeriores, ita ut quavis minuta 5 — 10 ictibus virorum pulsum superent, molliores debilioresque observamus, id quod haud difficile est explicatu, si ad maiorem earum sensibilitatem, minorem vero totius corporis, imprimisque systematis irritabilis firmitatem animum advertimus. Quod tamen aliter fit graviditatis tempore, quod virorum pulsum refert, quin etiam fortitudine et plenitudine excellit ⁵²⁾. In cuius rei causam optime inquisivit *Ioergius*, qui mulieres tunc validiores, et viris quodammodo similes esse probavit ⁵³⁾.

49) *Sprengel* l. c.

50) *Kopp*. I. l. p. 84.

51) Nam crescente irritabilitate sensibilitas, quae celeritatis praecipua causa est, coercetur.

52) *Galen* l. 3. de pulsibus causis c. 2. et de pulsu ad tironem c. 10. *Rega* l. l. p. 171. aph. 483. *Gruner* Semiot. p. 115. §. 148.

53) *Ioerg*, *D. I. Chr.*, über das physiol. und pathol. Leben des Weibes. Leipzig, 1820. 1. p. 70.

§. 9.

Si ad temperamenta et constitutiones, quae reciprocam in se invicem vim habent, respicimus, magnas quoque differentias, pro variis eorum modificationibus et conditionibus animadvertemus. Sic in temperamento quod *sanguineum* vocatur, quodque fere semper cum corpore gracili atque molli coniunctum est, et levitate quadam, inconsiderantia et inconstantia excellit, pulsum reperimus frequentem, celerem, mediocriter plenum, debilem, sed ob nimiam corporis totius sensibilitatem, quae etiam minimis rebus facillime afficitur, admodum variabilem; quare hic praesertim ad causas externas attentos esse nos oportet. In *phlegmatico*, illi e regione opposito, quod irritabilitatis functiones dormientes quasi, reproductionis vero, cuius etiam affectionibus maxime obnoxium est, dominantes exhibet, pulsum invenimus rarum, tardum, debilem. In *choleric*o, quod virili aetati proprium ⁵⁴⁾ iusta irritabilitatis et sensibilitatis coniunctione cognoscitur, pulsum habemus frequentem, plenum, magnum, fortem. In *melancholico*, corpori firmo et duro, sed ad venarum morbos proclivi plerumque insito, tardum, rarum et duriusculum pulsum observari licet.

Monendum tamen est, perraro haec temperamenta mera atque sincera reperiri, sed fere semper multifariam inter se mixta esse et insignes varietates exhibere, quas etiam ad pulsum varie mutandum plurimum valere probabile est. Et hae ipsae varietates videntur effecisse, ut permulti medici ad temperamenta eorumque

54) *Gruner Sem.* p. 32. §. 48.

effectus parum attenderent, veluti *I. B. Helmontius* ⁵⁵⁾, qui temperamentorum doctrinam nullius in medicina usus esse arbitrabatur, et *Schneiderus* ⁵⁶⁾, qui illam a temperamentis profectam pulsus differentiam idiosyncrasiam dicere mavult. Verum enim inter alia, quanta sit vis temperamentorum ad morbos procreandos aut certe eorum formas et characteres mutandos animadvertentes, difficilem quidem illam de temperamentis doctrinam, at gravissimam tamen omnique studio dignam esse fatebimur.

§. 10.

Cum his quae e diversis temperamentis gignuntur mutationibus, maxime convenire videntur eae, quae ab animi vel excitantibus vel deprimentibus affectionibus, atque commotionibus, maximam in systema arteriosum et pulsum vim exserentibus, profiscuntur. Nam inter omnes constat, homines sanguineo temperamento praeditos ad excitantes, melancholico instructos ad deprimentes propensos esse, cholericum vero gaudentes medium quodammodo tenere, cum phlegmatici ab omni propemodum animi affectione immunes esse videantur? Laetitia accelerari pulsum, frequentem fieri, validum, magnum; tristitia tardum, parvum debilem; iracundia celerem, fortem, durum; timore rarum, tardum, suppressum, debilem; terrore, qui tantam interdum in sanguinis circulationem vim habet ut haemorrhagias sistat ⁵⁷⁾, congestiones

55) Opera omnia ed. Frank. 1707. p. 53.

56) Adversaria de pulsu Lips. 1763. p. 23. et apud *Schlegel*. thes. Semiot. pathol. I. p. 412

57) *Schneider* l. c. p. 16. apud *Schlegel* l. c. p. 401.

creet etc., ab initio excitatum, magnum, mox vero depressum, parvum debilem; praeterea in omnibus fere animi affectionibus inaequalem, notissimum est. Sed non huius loci est, ulterius in hanc rem inquirere, cum notatu dignissimas, quibus reliquae varietates comprehensae sunt, breviter attigisse sufficere videatur ⁵⁸⁾.

§. 11.

Venimus ad aliam rem, quae ad variam pulsus, quin etiam temperamentorum et constitutionum, conditionem maximi momenti esse videtur, *aëris dico coelique temperiem*. E variis eius generibus illud optimum est, quod neque calore et frigore, neque siccitate et humiditate, et quae sunt huiusmodi alia, iustos fines excedit; hoc enim ut omnes vitae actiones maxime incolumes sint efficere, compertum habemus ⁵⁹⁾. Nam regiones nimis calidae aut frigidae, eodem fere modo corpus afficientes, parvum illud reddunt, itemque languidum et informe, pulsum vero efficiunt rarum, parvum, debilem. Valde memorabiles sunt etiam eae regiones, ubi cum magno calore humiditatem coniunctam reperi-
mus. Eas enim ad corporis formam omnemque eius conditionem, insignem quandam vim habere experientia docet. Ita Archipelagi Indiae occidentalis incolae magno quidem, sed laxo et ignavo corpore praediti sunt, quod ad venarum et reproductionis morbos maxime proclive sit pulsumque referat rarum, tardum, magnum, debilem. Ad coeli et inde orientes pulsus diversitates plurimum

58) *Gruner* l. c. p. 117. §. 152.

59) *Klose Aetiolog. der Krankh. des menschl. Geschl. Lpz. 1822. Absch. über das Klima.*

conferre etiam situm regionis vel elevatum vel depressum, itemque confinium locorum conditionem, notissimum est. Quocirca pulsum iudicatu-ros ad has quoque res respicere oportet. Nam in regionibus montosis, in quibus aër frigidior et maiore oxygenii atque lucis copia instructus est, systema irritabile s. arteriosum et morbi inde oriundi h. e. inflammatorii dominantur, ideoque pulsus frequens, celer, fortis et plenus invenitur. Quod ut fiat, minor aëris pressio, haud parum conferre videtur ⁶⁰). In humilioribus contra regionibus, quae calidiores, oxygenio ⁶¹) vero et lumine large instructae sunt, atque maiorem aëris pressionem patiuntur, vendum systema et reproductivum eorumque morbi in caeteris eminent quibus pulsus est rarus, tardus, languidus. Cui rei exemplo sunt insulae Walcherici, nec non permultae Germaniae borealis provinciae. Spectanda vero etiam est electricitatis quantitas, quae si adaucta est, pulsum accelerat, parvum et inaequalem reddit, id quod facillime apud multos homines observari licet, quando tonitrua instant ⁶²).

60) Klose l. c. §. 119.

61) Experimenta recentioribus temporibus instituta docuerunt, magis fortasse gasa nociva aëri admixta, quam oxygenii defectum accusandum esse, cum summa aut minima quae in aëre reperitur quantitas, nunquam tantum differunt, ut magnum inde in corpus effectum conicere queamus. cf. Klose. l. l.

62) Klose l. l. p. 259.

§. 12.

Anni quoque et diei tempora, haud exiguam in corpus vim exserunt. Si ad priora animum advertimus, aestatis praesertim et hyemis mutationes memorabiles sunt, cum hac, quae arteriosi systematis actionem adauget ⁶³⁾, pulsum plerumque frequentiore, validiorem et duriores inveniamus, si exceperis summos gelu gradus, qui rarum, parvum, depressum et debilem efficiunt; illa autem contrarium, nimirum celeriore, molliorem, languidum ⁶⁴⁾, experiamur. Ver et autumnus, qui ab hieme ad aetatem et vice versa transitum quasi parant, nec adeo ab illis differunt, obscurius tantummodo in pulsum agunt ⁶⁵⁾. Si porro varia diei tempora eorumque in pulsum effectus consideramus, multa nostra attentione digna reperiemus. Etenim matutino tempore pulsum tardiores, molliorem, magis aequalem observari licet, quam vespertino, ubi plerumque celerior, frequentior ⁶⁶⁾ et subdurus fit. Cuius rei causam magis in exaltatione quadam, et muscularium virium defectu, quam in adaucto musculorum motu (ut opinatur *Schneiderus* ⁶⁷⁾), quaerendam esse, praeter alia iam lassitudo illa et difficultas probat, qua omnes motus vespertinis horis perficiuntur, et somnus cuius recreatione diutius orbat, pulsum habent celerem, parvum et debilem. Somni tempore pulsationes

63) *ibid.* p. 269.

64) *Rega* l. l. p. 171. *infra* aph. 483.

65) *Grun.* l. l. p. 118. §. 154.

66) *Autenrieth* l. c. l. p. 209. *Klose* l. l. p. 269.

67) l. l. p. 14. *apud* Schleg. l. c. l. p. 398.

imminuuntur et retardantur, id quod bene docuerunt *Hamburgerus* ⁶⁸⁾, qui multis exemplis comprobavit, somni tempore in omni aetate quavis minuta horae parte denas pulsationes iusti numeri deficere solere, et *Diksonius* ⁶⁹⁾ qui certum reddidit, pulsum illo tempore lentiolem esse, et eo magis retardari, quo diutius somnus protrahatur, excepto evigilationis et eam proxime sequente tempore, ubi acceleratur paululum. Alii, ut *Morgagni*, *Langrish* pulsum somno accelerari retulerunt, quod tamen iam *Heusingero* ⁷⁰⁾ monente, quem ad hunc locum comparari volo, cum iusta somni sani observatione non convenit. Addere fortasse licet, quod dormientes plerumque decumbunt; hoc enim ad pulsus tarditatem ⁷¹⁾ haud parum conferre, neque etiam in aegrotis lecto retentis negligendum esse videtur.

§. 15.

Venimus nunc ad vitae genus atque rationem, quae largum uti morborum, ita pulsum mutatorum fontem praebent. Namque hominum sedentariam vitam agentium pulsum rariorem, tardiolem debiliolem et molliorem reperimus, quam eorum qui perpetua et magna exercitatione firmantur et roborantur. Cui accedit, ut hi, sub diu plerumque degentes, aëre puriore et salubriore fruuntur,

68) *Physiol. medic. Sect. 3. c. 4. §. 1367. p. 685. et p. 687.*

69) *Dissert. de somno. Edinbg. 1785. p. 27.*

70) *Heusinger, C. F. Commentat. semiologica de variis somni vigiliarumque conditionibus morborum etc. Isenaci, 1820. p. 9.*

71) *De Haen rat. med. 2. p. 57. T. XII. Gruner l. 1. p. 74.*

neque cibis et potibus relaxantibus et debilitantibus adsuescant. Idem fere valet de diaeta tenuiori et lautiori, imprimis vegetabili et animali, cum iis qui multis oleribus, fructibus et cibis e farina frumentorum confectis, aut his solis vescantur, mollius corpus, et pulsus rarior, tardior, debiliior esse soleat, quam illis, qui carnibus aut iusculis carneis nutriuntur; qui spirituosam amant, pulsum habent durum et tensum, qui vero magnae potuum eorumque aquosorum et tepidorum, copiae adsueverunt, laxum corpus et pulsum iusto tardiolem, molliorem, debiliorem sibi contrahunt; quod videre licet in iis, qui coffeam aut theam multa aqua paratam, aut cerevisiam albam, reliquis plerumque cibis spretis, magno haustu sugunt. Aromatum et medicamentorum excitantium nec non balneorum⁷²⁾ in pulsum efficacia omni attentione digna est, sicuti communis omnium alimentorum digestionis tempore effectus⁷³⁾, quo pulsus acceleratur et fortior redditur. Qua observatione fortasse *Morgagni* et *Langrishii* opiniones⁷⁴⁾, explicantur, qui hominum pleno ventre dormientium pulsum descripsisse videntur.

§. 14.

Ex omnibus, quae hucusque prolata sunt, quisque facile videbit, sanorum quoque hominum pulsum admodum variabilem esse; ut cum *Schneidero*⁷⁵⁾ dicere liceat „*quot homines, tot*

72) *Rega* l. l. p. 172. aph. 483.

73) *Rega* l. l. et *Gruner* l. l.

74) vide supra §. 12.

75) l. l. §. 10. apud *Scheg.* l. c. l. p. 406.

pulsus naturales“ etiamsi *Bellinio* ⁷⁶⁾ assentire nolumus, qui „*pulsum quemlibet esse alicui homini naturalem*“ contendit. Quae quidem experientia docemur, medici boni esse, quantum fieri potest, et sanorum hominum, quorum valetudo eius curae mandata est, nec non suum ipsius pulsum, optimum magistrum, interdum atque variis temporibus tangere, quo melius in aegrotantibus iudicare possit ⁷⁷⁾, quid morbo, quid statui naturali conveniat, cuius maximae interdum abnormitates morbo superveniente tolluntur, id quod imprimis valet de pulsationum aequalitate et ordine ⁷⁸⁾. Sed cave ne bene valentem credas, cui pulsus est naturalis, nam haud raro in morbis pulsum naturalem reperire licet ⁷⁹⁾.

§. 15.

Quod ad regulas in pulsu tangendo observandas attinet, has imprimis animo teneamus:

Tangendae sunt arteriae duobus aut tribus digitis mediis, in illis locis, ubi non magna adipis copia tectae sunt, et ossa vel alias partes duriusculas sibi substratas habent, quia sic tantum pulsus sensum percipere possumus ⁸⁰⁾. Quare in arteria temporali, maxillari, aut radiali, quae ad hunc finem optima est ⁸¹⁾, explora-

⁷⁶⁾ de Urina et pulsu p. 64.

⁷⁷⁾ Fundam. Semiol. p. 27. §. 27.

⁷⁸⁾ *Willis* opera. Sect. VI. c. 3. *Lancis*. de morte subit. c. 19.

⁷⁹⁾ *Grunero* l. c. p. 106. §. 141.

⁸⁰⁾ vide supra §.

⁸¹⁾ *Rega* l. l. p. 173. aph. 486.

bitur. Quod si inexpectatam aut insignem aliquam pulsus formam invenimus, in utroque brachio, aut pluribus etiam locis eximinandus est, cum haud raro mechanicae illius differentiae causae existant, veluti glandulae axillares aut ipsae arteriae induratae, quae, si minus circumspecte iudicamus, magnos errores gignere possunt. Aegrotus brachium modice extendat, nec ei incumbat, ligamenta et vestimenta illud comprimantia solvat, quo liber in arteria sanguis procedere possit; ut composito sit animo curandum; quare non simul atque eum primum videmus aut conclave ipsius intravimus, manus eius arripienda, sed pauca vel cum ipso, vel cum praesentibus colloquenda, fiducia paranda ⁸²⁾; et in reliqua quae ad veram et concinnam morbi cognitionem facere possunt, inquirendum est. Quo facto, pulsum digitis modice calentibus satis diu, h. e. per dimidiam certo minutam, horae partem, ita ut 30—40 ictus ⁸³⁾ circumspecte ⁸⁴⁾; interdum etiam saepius observemus. Quid quod *Frid. Hoffmannus*, medicus ille experientissimus, quartam circiter quadrantis horae partem, aegroti pulsum examinari iussit ⁸⁵⁾.

Quae omnia si rite perfecimus, illorum opprobrium effugiemus, qui plurimos medicos moris tantum causa pulsum tangere contendunt, veluti *Rega*, *Grunerus*, *Sprengelius*.

82) *Celsus*, A. C. de medic. l. III. c. VI.

83) *Gruner* l. I. p. 108.

84) *Galenus* praes. ex pulsu I. 4. p. 416.

85) *Fundam. Semiol. etc.* p. 28. §. 30.

Sectio posterior.

Semiotice pulsus pathologica.

§. 16.

Via sic, quantum e re nostra esse videbatur, munita, ad *pathologicas* pulsus *mutationes* transeamus, quarum nonnullas cum iam antea attingi debuissent, tamen ne bis eandem rem agerem, hoc demum loco pertractare constitui. Sunt autem aliarum nomina ita comparata, ut rem significandam satis luculenter exprimant; aliarum vero ita, ut explicationem habeant satis difficilem, cum medici in imponendis nominibus saepenumero duplici ratione peccaverint, vel eorum, quae antiquitate sancita erant, non iustam habentes rationem, unde synonymorum ⁸⁶⁾ pestis exorta; vel nimis subtiliter et argute distinguentes, id quod superioribus potissimum temporibus ob imperfectam sanguinis circuitus cognitionem factum videtur ⁸⁷⁾, sed ea in doctrina, cuius obiectum tantis variationibus, et tam diversae eius cultorum facultate tangendi et percipiendi obnoxium est, admodum perniciosum aut certe minus fructuosum

86) pessima ea sunt, quae eodem nomine diversas pulsuum species indicant, veluti *undusus Ettmülleri* et ille *Regae*, quorum prior optimis plerumque, posterior pessimis signis adnumerandus est. cf. *Ettmüllerus* apud *Bonetum* V. I. fol. 15. *Rega* 1. l. p. 139.

87) Fundam. Semiol. etc. 1. l. p. 14. §. 2.

habendum est, praesertim cum plerique medici auctores distinguendi per tactum rationem non adderent. Quae rem animadvertens *Plempius* „multa,“ ait, „medici nugantur, multaque mens „ingeniosa fingit, quae sensus nequit assequi ⁸⁸⁾.“

Commemorandum adhuc est, plurima pulsuum morbosorum nomina comparative intelligenda esse, veluti celer, frequens etc., quae nomina in pathologia usurpata, illam pulsus conditionem indicant, quae naturalem frequentiam, celeritatem etc. superat.

Sed singulas consideremus pulsus species, et pro viribus nostris earum naturam et indolem explicare studeamus, antea tamen monentes, easdem semper, quas prius proposuimus regulas et cautelas, in pulsu abnormi quam maxime animo tenendas et ante oculos habendas esse.

§. 17.

Pulsus frequens (der häufige), h. e. qui dato quodam temporis spatio plures ictus quam naturalis exhibet, a sola cordis ad-
aucta vi, integra arteriarum vi vitali et elastica, oriri et eas corporis conditiones indicare videtur, quas febrium simplicium nomine insignimus, in quibus quidem aequalitatem suam plerumque retinet, et fortis atque magnus invenitur; aut illas conditiones quas cum febre coniunctas plerumque videmus h. e. inflammatorias; in quibus quamdiu adest, morbum nondum debellatum et crudas materias indicat, cum contra eius decrementum, morbi auxilia fracta esse, et turbas in organismo sedatum iri nuntiat. Quando

88) *Vob. Plempius* Institut. med. fol. 318.

sub morbi fine iterum frequentior fit, latentes adhuc insidiae aut certe magna ad recidivum morbum proclivitas timendae sunt ⁸⁹⁾; vespertino autem tempore remittens, noctem quietam secuturam nos sperare sinit.

Reliquis morbi symptomatis non adversis, malis signis adnumerandus non est, nisi si modum excedit ⁹⁰⁾, ubi apoplexiam futuram et summam totius organismi exhaustionem portendit; quin permultis in morbis pro bono signo habendus videtur, cum validam systematis irritabilis contra potentias morbificas reactionem significet.

Rarius pulsus frequens in chronicis quam in acutis morbis invenitur, cuius rei rationem facile intelligent qui causae eius propioris, adauctarum nimirum cordis et totius irritabilitatis virium meminerint.

Wolfartus in libro supra laudato ⁹¹⁾, haec habet: „*dieser Puls zeigt mehr das Ergriffensein des Sensibeln in der Thätigkeit an, und ist dem kindlichen Alter in Krankheiten eigen*“; quae tamen magis de pulsu celere, qui sensibilitatem simul affectam indicet, quam de frequente praedicanda esse arbitror, qua de re paulo post pluribus.

Frequentia et *Crebritate* plerique auctores ut synonymis usi sunt, a quibus, quantum scio, solus *Wolfartus* recedit ⁹²⁾, qui

89) *Spreng. Sem.* p. 213. §. 492.

90) *Rega* pulsationum numerum quadruplicem interdum observavit.
cf. l. l. p. 155. infra.

91) p. 133. §. 159.

92) l. l. p. 132. §. 357.

crebrum pulsum a frequente distinguit, ratione tamen qua sensu discerni possint non addita, id quod fere ubique eum neglexisse valde dolendum est, cum eius praecepta magnam ingenii aciem testantia, hac de causa minus facile adhibeantur.

§. 18.

Si pulsationum in dato quodam temporis spatio numerus imminutus est, pulsum *rarum* (selten) vocamus, et cordis vim et irritabilitatem universam depressam, atque exhaustam, vel magna in vasis praesertim venosis obstacula adesse existimamus. Observari igitur licet, primo post omnis generis evacuationes debilitantes, in morbis diuturnis et pertinacibus qui intimam quasi medullam concutunt, veluti in febribus illis malignis, quae nosocomialis etc. nomine veniunt, in scorbuto, lue venerea, reliquis morbis cachecticis, ubi plerumque cum parvo, debili, vacuo coniungitur; pertinent huc etiam cerebri affectiones nonnullae, praesertim eae quae ab eius pressione pendent, quaemadmodum in Hydrope illius organi animadvertitur, ubi interdum miranda raritas adest; ita ut *Spens* novenos tantum in minuta ictus invenerit. Deinde praesertim in morbis gastricis chronicis, imprimis infarctibus et dilatationibus venae portarum eiusque ramorum, quae circulationem difficilem reddunt et rariores cordis contractiones efficiunt; quam quidem pulsus formam, morbis abdominalibus venoso-gastricis fere propriam, pulsum *abdominalem* vulgo vocant. Cavendum autem ne febris absentiam ex illo coniiciamus; cum pessimae saepe, ut iam supra monui, febres cum eo coniunctae sint, in quibus quemadmodum omnibus aliis in morbis eo peius signum est, quo minus caeteris symptomatis respondet.

Minus bonum iudicare possumus quam antecedentem, imprimis si debilitatem eum sequi cognoverimus; nam facillime intelligitur, difficilius esse amissos vires restituere, quam excedentes coercere, et ubique, si non peiora, certe status morborum diuturnitatem indicat.

§. 19.

Differunt ab his speciebus pulsus *celer* et *tardus*, qui a multis scriptoribus cum illis coniuncti sunt, veluti a *Fieno*⁹³⁾, *Grunero*⁹⁴⁾, *Schneidero*⁹⁵⁾ qui frequentem et celerem, communi *velocis* nomine insignit. Alii distinxerunt quidem, at distinctionem istam nullius ad praxin frugis habuerunt⁹⁶⁾, sed haec male: nam pulsus *celer* (der schnelle, scharfe) is vocandus est, cuius singulae pulsationes, minus temporis spatium quam in statu sano digitis ferendis impendunt, quod in pulsum rarum aequè atque in frequentem cadere potest. Nam etsi negare non possumus, pulsum admodum frequentem sine celeritate existere non posse, cum singula quaevis pulsatio insequenti celeriter cedat necesse sit, quo frequentes pulsationes fiant, nec pulsum celerem distinguere possumus si admodum frequens est⁹⁷⁾; tamen hac re non probatur, haud reperiri alias pulsum formas frequentiae expertes, cum celeritate coniunctas, ut

93) l. l. pag. 236.

94) l. l. pag. 73. §. 113.

95) l. l. §. 13. apud Scheg. l. l. pag. 417.

96) *Rega* l. l. pag. 155. aph. 456. *Bellini* l. c. pag. 75.

97) *Sprengel* l. l. p. 210. §. 488. *Hecker* l. l. p. 509.

adeo pulsus rarus saepius celer observetur. Neque illud *Fieni* ⁹⁸⁾:
*tum homines celeriter currunt, quando pedes in terra non multum
 quiescunt etc.*“ ad rem nostram infirmandam valet, cum etiam
 tarde prorgredientem pedes celeriter attollere posse nemo negaverit;
 imo potius nihil probat, quam celeritatem et cum frequentia et sine
 ea sive per se existere posse. Frequentem igitur pulsum tantum a
 pulsationibus se mutuo subsequentibus et intervallis interpositis di-
 cimus, in celere autem tantum ad temporis spatium attentimus
 quod in singula pulsatione arteria impendit ⁹⁹⁾.

Pendet ab acceleratis sed minus validis cordis contractioni-
 bus, quae quod roboris deest, celeritate compensare student, qui-
 buscum haud parva sensibilitatis affectio coniuncta esse, et insignis
 quaedam arteriarum motio longitudinalis ¹⁰⁰⁾ accedere videtur.
 Quam quidem de debilitate, contrationes cordis accelerante, sen-
 tentiam reperi apud *Blackallium* ¹⁰¹⁾ qui, ubi celeres et tremulos
 cordis in angina pectoris motus commemorat, hac explicatione
 usus est. Mirum his de causis esse non potest, quod eum mor-
 borum cum magna debilitate coniunctorum comitem videmus, e

98) loco proxime laudato.

99) *Prosp. Alp.* l. l. p. 233—236. *Rega* l. l. p. 155. aph. 455. Schol.
Fr. Hoffmann. de puls. nat. et usu med. rat. syst. T. III. s. 1. c. 12.
 §. 7. p. 269.

100) *Parry.* l. l. p. 132.

101) *Observations on dropsies with an Appendix on the angina pectoris*
 p. 383. *Blackall* über die Wassersuchten, nebst einem Auhang über
 die Brustbräune. Aus dem Engl. von *I. Radius.* Leipz. 1821. p. 221.

quibus nominare liceat Hydropes, imprimisque Hydrocephalum, sanguinis iacturas magnas etc., ubi cum raro et debili coniunctus est.

Synonyma esse videntur: pulsus *acutus*, quo nomine, perbene rem indicante, *Parry* eum nuncupavit ¹⁰²⁾; *brevis* et *velox* qui fortasse eo aliquid differunt, quod systole cordis in his citius peragitur quam diastole, qua re *Wolfarto* auctore ¹⁰³⁾; „*ein Vorwalten des Irritabeln beim Ankämpfen gegen ein Hinderniss*“ significatur, quæ tamen mihi ad praxin difficillime tantum applicari posse videntur; *acceleratus* et *citatus*, quibus nominibus ad frequentiam et celeritatem simul indicandam plerique medici usi sunt, aliis eum pulsum ita vocantibus, cuius intervalla breviora sint, quam ex ipsis ictibus sperare liceat, unde agitationis cuiusdam, quæ irritabilitatem sensibilitatemque exaltatam indicet, sensus oritur.

§. 20.

Si longius tempus quam in naturali statu fieri solet, pulsus ad digitos repellendos impendit, *tardi* (langsam), aut eodem iure quo *Parry* celerem *acuti*, *obtusi* (stumpf) nomine insignimus. Ab raro, quemadmodum celer a frequente, differt, quam rem ex antecedente paragrapho satis perspicuam hic silentio me transire posse iudicavi.

Causam habere videtur atoniam quandam systematis irritabilis et sensibilis, quare sæpissime in iis morbis reperitur in quibus

¹⁰²⁾ l. l. p. 131.

¹⁰³⁾ l. l. p. 132. §. 358.

utrumque affectum est, veluti in nervorum turbationibus quae dicuntur, in convulsionibus, Hydrocephalo, aut in illorum prodromis, quemadmodum in hystericis mulieribus, ubi novum vehementem morbi accessum nuntiat¹⁰⁴).

Mali praesertim angurii est, quando in morbis gravibus et diutius iam aegrotos excruciantibus apparet, praesertim si reliquis morbi signis non respondet, veluti inflammationibus¹⁰⁵), febribus; aut si cum intermittente copulatur.

Synonyma sunt pulsus *longus*, *retardatus*, *difficilis*, quorum primus brevi, secundus veloci, tertius accelerato et citato respondet¹⁰⁶).

§. 21.

Pulsus *fortis* (der starke) gignitur a cordis magna vi, congrua arteriarum tensione et sanguinis copia, quibus rebus efficitur, ut fortes digitis ictus exhibeantur, qui si maiorem gradum attigerunt *vehementes* vocantur.

Multa cum pulsu frequenti, quod causas attinet, communia habet, nimirum excitationem systematis irritabilis praecipue cordis, quare in febribus magnis frequentissimus et vehementissimus est¹⁰⁷), ubi saepissime palpitationum cordis, haemorrhagiarum,

¹⁰⁴) Zimmermann von der Erfahr. p. 346.

¹⁰⁵) de pleuritide iam annotavit Lieutaud. Precis. de la med. rat. T. 1.

S. 1. p. 10.

¹⁰⁶) vide supra §. 19.

¹⁰⁷) Rega l. l. p. 148.

aut si in arteriis potissimum carotidibus vel temporalibus observatur, epistaxeos, oculorum, aurium, meningum futurarum inflammationum, deliriorum, apoplexiae nuntius est, id quod criticis praesertim diebus expectandum. Alias obstacula in vasis, cordis si integra, causae illius contensionis sunt, quibus praesentibus plerumque cum raro coniungitur, quod etiam in pulsu illo abdominali ¹⁰⁸⁾ videre licet.

In universum pro signo bono haberi potest imprimis si aequalitatem obtinet, cum cordis, quae est systematis irritabilis pars primaria, et organismi totius robur indicet, quod si modum excedit, vel ipsius naturae contentione atque vi medicatrice, vel arte plerumque facile frangitur.

A multis *validus* pulsus atque *robustus*, aut *impetuosus* vocatus est; sed priores illi sano tantum statui tribuendi esse, posterior vero cum vehemente convenire videntur.

§. 22.

Pulsus debilis (der schwache) a cordis infirmitate, arteriarum elasticitate imminuta et parva sanguinis copia gignitur, et eam ipsam ob causam plerumque mollis est, etiamsi interdum duriusculi quid admixtum habeat, cum causae durum pulsum efficientes haud raro simul adsint. Digitos leniter tantum adpellit, qui propterea ei leviter applicandi sunt, ne plane supprimatur.

Pessimis pulsus speciebus associandus est; nam organismum luxurie, inedia, morbis corporis et animi exhaustum significat,

108) vide supra §. 18.

morborumque non solum diuturnitatem et gravitatem, sed etiam animi deliquia et generosorum organorum corruptionem indicat, praesertim si cum aliqua duritiei specie et intermissionibus coniunctus est. Quicunque bona ex eo praesagiverunt, cum molli eum commutasse videntur, quod bene iam monuit Sprengelius l. l.

Pulsus *languidus*, huc referendus, eo tamen differt, quod tarditatem comitem habet, id quod plerique neglexerunt.

§. 23.

Pulsus *magnus* (der grosse) ea pulsus species vocatur, in qua arteria supra diametrum naturalem modica vi expanditur, quod quidem a sanguinis maiore copia et magna eius unda e corde emissa efficitur; quare semper validus, neque vero, uti vult *Heckerus* ¹⁰⁹⁾ durus est.

Invenitur in hominibus robustis et validis, aut iis quibus ob membrorum maiorum resectionem nimia, ad corporis magnitudinem, sanguinis copia est; et nisi cum aliis morboris pulsuum speciebus coniunctus, fere semper boni augurii haberi potest, quippe cum in morbis acutis, in quibus praesertim cum frequente occurrit, imprimis si antea parvus fuerat, uberes virium fontes, iustas crises futuras ¹¹⁰⁾, valetudinem redeuntem et ab recidivis morbis immunem nuntiat.

Monendum est adhuc, quod in hominibus gracilioribus pulsus saepe magnus esse videtur etiamsi non sit, quemadmodum in hominibus obesis pulsus satis magnus saepe parvus sentitur.

109) l. l. p. 511.

110) *Sprengel* l. l. p. 223.

Pertinent huc pulsus *altus* et *latus* quem utrumque *Gru-nerus* ¹¹¹⁾ celeri associat, itemque *amplus* et *manifestus*.

§. 24.

Ei oppositus est pulsus *parvus* (der kleine), in quo arteria non ad iustum diametrum expanditur, quod a parva sanguinis copia, et infirmato cordis robore efficitur.

Quae quidem causae si rite iudicantur, hanc pulsus speciem peioribus accensendam esse quivis facile intelliget. Vulgare signum est vel exhaustarum totius organismi virium, quod reperitur post evacuationes nimias quascunque, digestionis et nutritionis functiones diu laesas, et morbos pertinaces ubi plerumque cum debili et vacuo copulatus est, quin etiam certissimum ¹¹²⁾ mortis appropinquantis, praesertim si celeritas, contractio et languiditas accedit; vel congestionum localium, ubi plerumque in contracti et duriusculi societatem incidit. Pertinent huc prae caeteris congestiones ad cerebrum directae et inde orta cephalalgia, ubi deliria haud raro eum sequuntur; dolores omnis generis vehementes ¹¹³⁾, imprimis a calculis urinariis effecti. Huic causae si debet originem, plerumque non admodum timendus est ¹¹⁴⁾, quod tamen, *Gortero* monente, longe aliter se habet in pulmonum morbis, et *Zimmermanno* ¹¹⁵⁾ iudice, in enteritide ubi gangraenam indicat.

¹¹¹⁾ l. l. p. 74. §. 113.

¹¹²⁾ *Kopp*. l. l. p. 54. *Gruener* l. l. p. 106. §. 141.

¹¹³⁾ *Rega*. l. l. p. 151.

¹¹⁴⁾ *Bagliv.* de fibr. motr. l. I. c. V. fol. 287.

¹¹⁵⁾ l. l. p. 350.

Pulsus *profundus* et *angustus*, quos *Grunerus* ad tardum suum trahit, hic meliorem locum habere videntur; nec ab eo differt *exilis*, gradu tantum diversus, *humilis*, *obscurus*, *latens* et *concisus* ¹¹⁶).

§. 25.

Plenus (der volle) pulsus praesertim a sanguinis arteriam replentis copia dicitur ¹¹⁷), cordis atque arteriarum viribus imminutis, quo efficitur, ut systole atque diastole neque iusto robore, neque satis distincte perficiatur, atque idcirco pulsationes arteriarum atque intervalla minus bene percipi possint; qua quidem re differt a magno quocum ceteroquin convenit et a multis medicis coniungitur ¹¹⁸). Quod tamen male faciunt; nam non quivis plenus pulsus magnus quoque est, nec parvus vacuus, imo contrarium saepius animadvertitur.

Indicat reproductionem abnormem supra irritabilitatem eminentem, ubi venis similis fiunt arteriae, venae vero ipsae morbose affectae sunt; quare in hypochondrico malo, scorbuto, febribus malignis etc. haud raro observatur.

Iudicium de eo ferendum pendet ab iis quae modo commemorata sunt. Timendus praesertim videtur quando cum magna

¹¹⁶) Fundam. Semiol. p. 16. §. 17.

¹¹⁷) Spr. Sem. p. 270. Parry. l. l. p. 132.

¹¹⁸) Fundam. Semiol. l. l. pag. 16. §. 7. Rega l. l. pag. 147 aph. 436.

Gruner l. l. p. 75 §. 115. Parry l. l. p. 132.

debilitate coniunctus est, utpote syncopen nuntians¹¹⁹⁾; itemque in lethargicis ubi e parvo aut vacuo prodiit.

Pulsus *amplus* auct. huc pertinere videtur.

§. 26.

Pulsus *vacuus* (der leere) est, cum nobis digitis ad arteriam applicantibus vacuitatis sensus imperitur, qui ab sanguinis inopia et arteriis non ad gradum illi congruam contractis oritur. Cor et imprimis vasa admodum relaxata et debilitata esse videntur, unde fit ut non pro sanguinis exiguitate contrahantur atque parvum pulsum efficiant. Summam vacuitatem vocant *inanitatem*, de qua magis adhuc quae de pulsu vacuo dicta sunt valent.

Peior etiam iudicandus est quam parvus quocum communes fere causas habet. Mali praesertim augurii est sub febrium acutarum initio, ubi secundum *Sprengelium*¹²⁰⁾ spasmos futuros indicat; et in morbis diuturnis, quando cum celere coniungitur, quo in conubio *vermicutanlis* aut *vermicularis* (der wurmförmige) nomine venit. Vermiculantis maior gradus *formicans* (der Ameisenpuls).

§. 27.

Pulsus *durus* (der harte) efficitur, si arteriae parietes maiorem digitis vim opponunt, nec se comprimi sinunt; quod *Parry*¹²¹⁾ a sola vi cordis celeres et validas contractiones facientis derivare

119) *Galen.* pr. ex pulsu IV. 11.

120) l. l. p. 222.

121) l. l. p. 132.

conatur. Quae quidem explicandi ratio, etiamsi aliis de causis non esset reiicienda, ideo tamen probari nequit, quod pulsum durum plerumque parvum et saepe debilem, licet celerem ¹²²⁾, reperi-
mus. Imo potius ad tunicam arteriarum muscularem respiciendum est, quae vel nimis contracta vel etiam indurata est, et ad sanguinis per minimas vias transitum impeditum ¹²³⁾, veluti in senibus quorum pulsus viribus cordis saepe admodum debilitatis, tamen duritiem refert.

In morbis observatus aequilibrium, inter cordis et vasorum vim sublatum cum nervorum magna affectione indicare videtur. Proprius quasi est membranarum inflammationibus earumque partium quae multis ligamentis et tendinibus instructae sunt, nec non induratarum partium et scirrhorum; quare in meningitide, pleuritide, enteritide, oculorum et hepatis inflammatione etc., scirrhis pulmonum, hepatis, ventriculi ¹²⁴⁾ etc. saepissime occurrit, in quibus posterioribus frequens plerumque est et celer ¹²⁵⁾. Mirum quod fere nunquam in inflammatione parenchymatis pulmonum observatur, quae eo facile a pleurae inflammatione distingui potest; quod iam monuerat *Galenus* ¹²⁶⁾ et ad hunc usque diem probatum est.

His recte iudicatis vix necesse esse videtur aliquid adiacere adhuc de eius iudicio praeter *Boneti* illud, eum febribus superveni-

122) qui cordis vim testari nequit. vid. supra §.

123) *Autenrieth*. l. c. I. p. 218. §. 364.

124) *Pohl, Fr. G.* Collect. quaed. de gastritide etc. Lips. 1822. p. 39.

125) *Fienus* l. l. fol. 238.

126) de puls. caus. l. IV. c. 13.

entem crises turbatas, convulsiones, deliria, ipsam mortem nuntiare; sed transeo ad alias pulsus formas, quae haud multum ab eo recedere videntur: intelligas *tensum* (den gespannten)¹²⁷⁾, qui maiorem cordis vim, maiorem vero etiam nervorum perturbationem indicat, et plerumque durus et plenus est; *contractum* (den zusammengezogenen), qui a summa arteriarum contractione et nervorum affectione gignitur et e parvo quasi et duro conflatum est; quando autem cum magno cordis robore coniunctus est, chordae vibratae sensum cum digitis communicans *vibratus* (der saitenartige), quando vero in inaequalitatis aut aliorum spasmos indicantium signorum, urinae pallidae, convulsionum etc. societatem venit, *spasticus* (der krampfartige) vocatur; itemque *serratum*, e duro, celerem et forte compositum, et ictuum quasi acuminem insignem, qui iudicandus est ad coniunctionem illorum pulsuum, atque ideo ut signum status inflammatorii nervosi semper admodum reformidandus videtur.

Pulsum *mollē* (den weichen) vocant eum qui facile digitorum pressioni cedit, et arteriarum tunicas neque induratas neque in iustum modum contractas et omnes sanguinis vias liberas indicat. Plerumque pro bono signo habendus est, nisi mollities modum excedit, aut reliquis morbi signis repugnat, si lingua sicca manet, urina flammea mingitur reliq. ubi cum debili, quocum ceteroquin non confundendus est¹²⁸⁾, convenit, vires vitales fractas at-

127) Wolfart. p. 131. §. 351.

128) Gruner l. l. p. 76. §. 116. Schol.

que vasorum irritabilitatem et nervorum imperium imminutum indicat, eamque ob causam mali plerumque ominis est, quemadmodum in anginis malignis, chronica intestinorum inflammatione etc. Memorabilis eius cum pneumonia coniunctio nondum explicata, de qua iam antecedente paragrapho mentionem inieci.

Hic pulsus *solutus* (der gelöste) ¹²⁹⁾ commemorandus, quo nomine mollem tum insignimus, quando e duro provenit.

§. 29.

Sunt adhuc quaedam pulsuum aequalium species quae saepe medicorum ore celebrantur: *undosum* dico, *reviviscentem*, *serpentinum*, *decrepitantem* et *destructorium*.

Undosus (der wellenförmige) tum vocatur, quando pulsus magnus, plenus, mollis cum maxima aequalitate et ordine coniuncti reperiuntur, qua coniunctione in morbis, praesertim in febribus, obvia, crises bonas plerumque per sudorem aut urinam futuras certo sperare licet. De qua quidem re assentientem habeo *Gruenerum* ¹³⁰⁾ qui cum magno eum haud male coniunxit, *Wolfartum* ¹³¹⁾ et plures alios graves auctores. Excludendus autem undosus *Regae* et aliorum, qui cum tremulo eum confudisse videntur et inaequalis pulsus speciem esse voluerunt ideoque auguria ex eo capta pro malis habent ¹³²⁾.

129) *Wolfart*. l. l. p. 130.

130) l. l. p. 76. §. 115 Schol.

131) l. l. p. 135. §. 365.

132) *Rega* l. l. p. 160. aph. 465.

Revisviscens s. *exardens* (der sich hebende, wieder aufhebende) pulsus dicitur, qui cum antea parvus, contractus, debilis etc. fuerit, maior iterum, mollior, fortior fit, eamque ob causam, nisi reliqua id prohibent morbi symptomata, salutis recuperandae spem facit.

Serpentinus pulsus (der schlangenförmige) e debili, vacuo et celere oriens, cognoscitur diastole et systole cordis ob magnam debilitatem vix distinguenda, unde sanguis in arteriis uno quodammodo flumine sed debili et parvo movetur. Pessimi augurii est.

Reviviscenti oppositus est pulsus *decrepitans* s. *praeterlabens* (der erlöschende), qui tum observatur, cum pulsus iamiam tardus, debilis, parvus etc., magis magisque decrescit.

Destructorius pulsus (der zerstörende) is vocatur, qui ultimam quasi vitae contentionem declarat, et quo manifestior est, eo citius ad letalem finem perducit; frequentissimus nimirum est, celerissimus, maxime contractus et durus.

§. 30.

Venimus ad pulsum *inaequalem* (den ungleichen) eiusque varias formas; in quibus quidem iudicandis ratio habenda est spatio- rum temporis diversorum, quibus singuli ictus percipiuntur, eorum varii impetus et motus arteriarum cum corde sive congrui sive non congrui; quas quidem res vel separatas vel inter se coniunctas, pulsus inaequalis formas efficere notum est. Causae remotiores sunt vasorum obstructions, nimis aucta totius corporis irritabilitas et sensibilitas unde spasmi oriuntur, vitia denique organica, quae tamen causa rarissima esse videtur.

Quemadmodum aequalis pulsus plurimas species, ita etiam inaequalis nonnullas in hominibus relativa aliqua sanitate fruenti-

bus observare licet ¹³³). Qua re docemur in pulsus aequalitate iudicanda ad reliqua quoque morbi symptomata quam diligentissime esse respiciendum, ne in sententia ferenda fallamur.

Pulsus ratione temporis aut impetus inaequales, h. e., quorum ictus modo frequentiores modo rariores, vel nunc maiores nunc minores percipiuntur, communes causas habere videntur eas, quas §pho hac ineunte recensui. Observantur idcirco in spasmodicis cordis affectionibus ¹³⁴), valvulis eius vel trabeculis induratis, vasorum maiorum dilatatione, scabritie ¹³⁵), in polypis cordis et arteriarum; in inflammatoriis atque nervosis affectionibus vehementioribus fere omnibus.

Quaecunque harum causarum adsint, fere semper pro malo signo habendus est, quippe cum vel difficillime vel omnino non tollantur omnemque artem eludant.

Quod ad tertiam inaequalitatis speciem attinet, illam scilicet, ubi cordis pulsationes aliae inveniuntur quam arteriarum, ea vel a magna debilitate, vel spasmo, vel denique organicis vitiis proficiscitur; aut enim cordis contractiones ita debiles sunt et celeres ut duae, tres, pluresve ad unum arteriarum, praesertim a corde remotiorum, ictum efficiendum requirantur; aut ob annuli venosi ¹³⁶) vel aortae contractionem sive spasmodicam sive ex organicis vitiis natam, duplicis pulsationis sensus procreatur, cuius alterutra tantum sanguinem e corde propellit. Rarius arteriarum pulsationes numerum in corde observatum superant, quod ubi fit, e peculiari quadam motione longitudinali retrograda oriri videtur ¹³⁷), quam rem probant ictus alterni debiliores et minores.

¹³³) Kopp, l. l. p. 57. — supra §.

¹³⁴) Blackall. users. v. Rds. l. l. p. 214.

¹³⁵) ibid. p. 232.

¹³⁶) Parry l. l. p. 128. ¹³⁷) Parry, l. l. p. ! Hecker. l. l. p. 54.

§. 31.

Interdum inaequales pulsus ordinem quendam servant, ideoque peculiaribus nominibus insigniuntur. In his numerandi sunt:

Pulsus *dicrotus* s. *bis feriens* (der zweischlägige) et *caprizans* (der hüpfende). In priori magnum ictum cito excipit parvus, quem dein intervallum subsequitur. Differunt hae pulsus species etiam eo, quod in posteriori plures saepe ictus recte succedunt, et tum demum inaequalitas animadvertitur.

Significant spasmos vehementes quibus cor vel idiopathice affectum est, vel ob vasa contracta ad inordinatas contractiones compellitur; cui accedit, *Bellinio* auctore, percussio quaedam sanguinis e vasis obstructis procreata.

Uterque imprimis vero *caprizans* pessimis signis adnumerandus videtur ¹³⁸⁾, quod tamen aliter visum est *Lommio* ¹³⁹⁾, qui cum alio eum confudisse videtur. *Abercrombie* ¹⁴⁰⁾ utrumque subsultorii nomine coniungens fallacissimam eam pulsus formam censet, cum eum se observasse dicat non solum post refrigeria magna, et epulas lautas, verum etiam in morbis per se non lethalibus veluti ictero, hypochondria etc.

Pulsus *myurus*, s. *decurtatus*, s. *mutilus*, s. *sensim gracilescens*, *intercurrents* Spr. (der mauseschwanzähnliche, abgleitende) is vocatur cuius singuli ictus minores sensim deinceps et celeriores fiunt; quorum minimum si maior iterum et fortior ictus sequitur, novam quasi seriem aperiens, *recurrens* s. *reciprocus* (der wiederkehrende) appellatur; sin vero non sequitur, a quibusdam *minutus*, rectius vero a *Grunero* deficiens nominatur.

Proficiscitur utraque huius pulsus funesti varietas a vi cordis fere iam penitus fracta, et minimam tantum, ne dicam nullam, vitae servandi spem facit.

¹³⁸⁾ cf. Sp. l. l. p. 168. ¹³⁹⁾ l. l. p. 309. ¹⁴⁰⁾ de variet. puls. S. VI.

§. 32.

Restat adhuc commemorare illam pulsus speciem aut singulorum aut plurium ictuum defectu insignem, quam *intermittentem* (den aussetzenden) vocamus. A pluribus medicis pro summo inaequalitatis quoad frequentiam gradu habetur, cum tamen interdum, praesertim si ordinem quendam in intermissionibus servat, eodem vel maiore etiam iure pro summo pulsus rari gradu habendus videatur. Certe non inaequalium pulsum periculosissimus iudicandus est, cum salva fere sanitate multorum hominum pulsus per totam vitam intermittat.

Causas habet quascunque pulsum inaequalium esse in universum diximus, intelligas nervorum affectiones vel primarias vel secundarias, cordis vasorumque maiorum motum impeditum etc: quare in inflammationibus vehementibus, veneficiis, convulsionibus; hydrope pectoris imprimis cardiae, tumoribus pulmonum, vomiciis etc; valvularum vel vasorum cordis aut aortae ossificationibus, aneurismatibus, infarctibus etc. Ab his causis ortus magnus plerumque, rarus et fortis est singulis tantummodo ictibus deficientibus; exceptis fortasse nonnullis cordis affectionibus, praecipue iis quae anginae pectoris nomine veniunt, ubi debilis et per integras horas intermittens, tamen interdum redit, at summum vitae periculum minatur. Cui rei documentum est historia morbi magni illius *Io. Hunteri*, a *Homio* nobis servata ¹⁴¹⁾. Quando vero summam cordis totiusque organismi debilitatem significat, ubi debilis, celer, vacuus, inordinatus etc. observatur, plures plerumque ictus eliduntur.

Commemorandum adhuc est, interdum pulsum, cum cor et reliquae arteriae iustas pulsationes exhiberent, uno aut altero loco intermittentem aut plane deficientem repertum esse; cuius rei causa plerumque satis obscura, nisi arteriam compressam aut vulneribus laesam novimus, in eo fortasse quaerenda videtur, quod adeo contracta est, ut pro mortua haberi possit, de qua re conferas *Parryum* ¹⁴²⁾ et *Koppium* ¹⁴³⁾ vehementer cupio.

¹⁴¹⁾ *Home*, Life of I. Hunter p. 46.

¹⁴²⁾ l. l. p. 124.

¹⁴³⁾ l. l. p. 57 sq.

